

七



太平三書卷之五

濟南張萬選舉之甫編輯

蕪湖勝槩二集

湖陰曲和溫庭筠

李綱

繡鞍玉勒黃金鞭躍馬直入無王前繞營三匝人不  
識天風翻動旌旗鮮賊臣晝寢蒼黃起夢裏陽烏光  
照水追風鐵騎去非遲真主那從賊中死寶鞭傳玩  
日淒淒行遠不聞天馬嘶千金安用試虎口將帥何

人思鼓鞞西南火星寒有銘畫衣繡袞垂平章九重  
宮殿銷春色豈知萬里秦城長

過蕪湖

南 埜

湖山夢不到襄闈六載沉酣一出遲漁子能言飛渡  
處市翁親見潰師時權臣貴戚戈相籍北槳南檣風  
背馳事逐孤鴻今已矣年年水落荻芽肥

過蕪湖

貢師泰

昨日何處別今朝此地留青山逼岸起白水滿江流

雨隱巡鹽鼓風腥掛網舟何時歌款乃同買綠蓑遊

神山雨

許有壬

山中日日雨松竹早知秋清響自深夜逸人無遠愁  
窓虛聞葉落林暗見螢流對景因懷杜江村事事幽  
欲攜竹杖叩巖扉尊酒同人坐翠微日暮青山看不  
盡白雲遙伴老僧歸

赭山

孫 旭

滴翠軒

馬 亮

高閣登臨暑氣空  
綠槐蟬噪咽清風  
我今到此須懷  
感多少行人道路中

清風樓

程員

雄然百尺清風樓  
砥柱屹立江之頭  
勢欲吞此長江流  
蛟龍蟠下潛生蚪  
峻嶒煙浪擁丹丘  
淮山前列飛浮旂  
五月六月寒颼颼  
送君攜酒先泊舟  
舉頭南北心悠悠  
君今壯行登瀛洲  
玉瓶倒盡胡綢繆  
一方豪氣憑君收  
散分天下作此清風儔

荆山

林弁

磅礴屹立湘陵中  
雄奇萬仞摩蒼空  
天寒地凍艸木落  
獨見森爽開芙蓉  
芙蓉倩翠嵐光簇  
雪洗山容奪人目  
微明螺髻幾抹青  
隱映蛾眉半痕綠  
雲蘿烟篠難躋攀  
流泉掛壁飛晴瀾  
劃然點破自然碧  
忽來孤鶴峰前翻  
乾坤造化相推遷  
後凋松柏含春煙  
須臾寒色變和氣  
降靈吐秀鍾英賢

荆山記

曾表

嶺南野叟曾表曰蕪湖濱大江西澣宅平行其作邑  
治依微數峰若江雲然遙遙東南來二山壁立號荆  
山九域志云卞和得玉之所豈蕪故臬茲爲春秋楚  
封固有之歟按圖經姑孰北來二十里有鳳凰山迤  
邐入蕪境西起神山越赤鑄左亘柳家迤入縣爲後  
山其縣南來三十里有白馬山白馬左出而東爲施  
陸山東以北爲磴根山孤山大荆山小荆山而盡於  
丹陽之濱此圖經之概也而形家之論謂蕪祖九華

派出楊木渡起白馬屹荆山渡河而西爲神山其脉  
經百家店河故河中多崩洪石委蛇隱躍狀若虬龍  
丹陽諸湖皆其養蔭荆實爲蕪少祖故其勝律兀奇  
絕與古來風會若有肖云荆山去邑十六里水陸皆  
從馬塘路南一路有石甃乙卯年沈孝廉鳳來扞路  
極水府廟迤西而入爲大荆山大荆高二十五丈周  
迴九里山口居人二十餘家碧桃翠竹夾道陰森時  
聞雞犬聲入山門便作桃源境界觀矣百餘武爲朱

家園園有亭館花卉可坐亭孤縣半壁最幽眇其麓  
時有白雲出沒園南二百餘武東折上旋北二十武  
爲坊門爲梵宇晉唐時建後倚石壁橫十餘丈高五  
丈如屏滿面皆生佛大小百數各肖其相丙辰水部  
鄭公薨簷其上爲石佛殿殿左腋石門梯三折攀緣  
而出轉磴道下又左爲文昌祠祠最峻階三十餘級  
坐瞰長江下臨歐陽湖湖古道通百家河可數百畝  
環合岡陵邑令歐陽圭齋先生嘗遊其間俗遂以先

生名湖詩載邑乘今湖改爲田遊踪遂絕閣左過石  
梁爲華嚴樓旁有鄭水部碑亭邑孝廉湯惟一撰文  
樓通山巔古傳鶴跡石仙人所遺及後盜鑿其跡滅  
沒樓左竹徑劣崩下歷翠微石繞足如筍如鈎如圭  
如劍戟可緩步不能肩輿三里許有壁如削橫百餘  
尺壁下方石可坐二十人面對天城湖四時燄光陸  
離如石鏡坐間習習風生丁巳春侍御駱公偕水部  
劉公游鐫題寒壁二字壁頂員秀遠望若金釜卽之

皆巉石可畏上勒嘉靖間許水部買山碑循湖崖二里許爲小荆山狀類蛾眉山古志東南麓有龜文石石下有穴時出龜與大荆山夾湖對峙形家謂邑文學天馬星中立梓潼祠上豎禁採石碑亭聞之父老荆山舊縣民籍牟利者日尋斧其間氣脉凋殘文風寥落若而年水部許公邑令邵公捐金買山爲官斥採鑿又若而年王氣始完由此言之荆山之祖蕪而不以丹陽盡徵矣丁巳歲浦城之役黠工謬言荆有

石可採捧南廠三檝至旦夕欲啣且盡闔邑震驚幸藉手士民疏上請輟之旣博士弟子白水部錢公公戊午夏招遊得寓目焉憮然久之曰世有至壁人不護而惜乃忍之哉於是出寒壁步大荆東偏望萬頃湖汪洋萑葦菁蔥沼流清濁分環匝其下指而曰此平巒帶河者夫非山之門人人舉足可到橫目可索乎其爲我亭而碑之以觀來者烏在乎山之陽而徒與苔蘚風雨莽莽盡也乃貽太官鳩工速視成事于

是荆山益巍然東南巨鎮焉脩仲子曰余少讀毛氏  
詩至魯保有鳧繹與太山並頌疑並峙矣旣長遊鄒  
魯故墟鄒西北鳧繹在焉以眎荆何翅一卷而名藉  
甚豈培塿足術哉廣洋之內天地奧區必有靈根異  
脉沈鷲翔翼而來故荆胤九子而屹立平蕪一卷猶  
萬仞也又况其嵯峨廓落滌河挾湖莽蒼沈濛雲起  
風呼四空無礙九野同趨日升月盪平楚吞吳當春  
時和百卉昭蘇連帷擊楫人士禺禺江天浩渺若駕  
舳艫懸崖拍岸浴鷺排鳧青疇拂浪綠沼搖襦金飈  
送羽嘹唳天衢霜黃雪白翠黛不渝自公多暇時問  
菑畚邇而撫之荆珍魯璵悠而會之輞川鑑湖古今  
鄒魯屹峙同符願言保之片石千璫時戊午六月六  
日記

螺磯紀事

王宗聖

義烏外史王宗聖曰登螺磯者取諸江上孤岑風景  
清絕而往事是非姑寘之云昔劉備爲荊州牧治公



安孫權憚之獻妹固好及備西權請歸妹備定益州  
時孫夫人還吳已十載羣下勸之納劉瑁妻爲夫人  
後進爲王后皇后尊爲太后皆瑁妻吳氏蓋孫在劉  
僅再稔先主後主卽位推尊俱不之及其偏夫人仍  
牧夫人是已權始謀之妹將于閨闈之內甘心備焉  
不可而迎歸事成孫夫人舟及磯且近建業自謂不  
忍見兄遂沒于磯則其死在備之先其卽位也曷不  
加尊而表之乎或謂省母過灤江聞昭烈崩哀殞葬  
此山則其死在備後禪之卽位又曷不推尊而表之  
乎若權母以己丑卒昭烈以壬寅崩謂壬寅省母歸  
則其所省者非旣卒之母邪歸妹在辛卯省母在壬  
寅豈歸吳矣而又曷日返蜀邪要皆不經之言無足  
辯者使孫果爲劉而死則其轟轟然貞心姱節可垂  
後世而烈穆二后傳未嘗少及之何也獨以穆皇后  
傳附見孫夫人然及其還吳之音而不及其死劉之  
故彼所欲有甚于生是豈輕死者邪人知操爲漢賊

太平三書 卷之五  
不知權爲漢賊孫夫人之死爲劉所以爲漢質諸綱  
常權視妹媿死萬萬矣予是以惜陳壽之略於史也  
卽壽銓叙或略而裴松之旁摭缺遺於此獨遺之何  
也大都孫氏死事莫詳意必有近似者是以國人義  
之俎豆血食歷宋元至于今我 太祖平漢遡江次  
于磯龍袍香帛之祝政以其生貞死靈而奇之也若  
夫雨暘愆期禱磯立應風濤怒驚往往委命必江之  
神也而神廟之麗江上抑流俗從夫人借以神其事  
爾磯頭有螺穴其磯絕景一小金山宏藝苑詞人古  
今操觚者弗可輟云山史云靈澤夫人龍女之神也  
宋政和中降祝板亦云螺磯山靈澤廟龍女靈澤夫  
人則神爲龍女無疑必以孫劉之誕委曲證之鑿而  
陋矣

螺磯迎神曲

邊維垣

涉大江兮沄沄見帆檣兮如雲緬神女兮駕馭望瑤  
崑兮杳深聞環珮兮至止享千秋兮蘭芷

送神曲

前人

奏鈞天兮雕闌集海錯兮神歡波不動兮月明山空  
寂兮鶴鳴香篆銷兮神返承休祚兮綿遠

螭磯

王畿

大江東下一螭雄玉女棲靈是舊宮遙望天門渾欲  
斷迴看吳苑正無窮關河不改漢時月童冠猶存沂  
上風明日扁舟向何處九華應在萬山中

謁靈澤夫人祠

劉曰寧

廟貌風波地蛟龍護水紋江通巫峽道山接石頭雲  
劍佩思神武犧牲動聽聞舊斑南岸竹非止爲湘君

靈澤夫人祠

胡啓先

螭磯石小如拳江可涸石年年江流日夕催行客蜀  
漢亾魂挽不得美人遺恨何能平悲風颯颯雲冥冥  
石上千秋應有靈

夢日亭

楊萬里

老賊平欺晉鼎輕一輪日色夢中驚寶鞭脫急非無

策何似休將日繞營

玩鞭亭

張憲

畸鳥壓營營作聲紅光紫電圍金鉦黃鬚小龍馬上  
笑白首饑豺夢裏驚老奴怒擲珊瑚枕追兵起合琉  
璃井巴馬東歸疾似風道傍遺糞如冰冷健兒空玩  
七寶鞭荆臺老姥功誰傳

歐陽湖卽事

曾泰

湖姓歐陽自昔年先生風月信無邊西湖可了官何  
事南顧無憂吏亦仙滄海豈須論變態高山猶自見  
前賢憑闌不盡觀原意獨立滄茫問簡編

太平三書卷之五終

太平三書卷之六

濟南張萬選舉之甫編輯

繁昌勝槩一集

繁昌縣學記

王安石

莫先師先聖於學而無廟古也近世之法廟事孔子而無學古者自京師至於鄉邑皆有學屬其民人相與學道藝其中而不可使不知其學之所自於是乎有釋菜奠幣之禮所以著其不忘然則事先師先聖

者以有學也今也無有學而徒廟事孔子吾不知其說也而或者以謂孔子百世師通天下州邑爲之廟此其所以報且尊榮之夫聖人與天地同其德天地之大萬物無可稱德故其祀質而已無文也通州邑廟事之而可以稱聖人之德乎則古之事先聖何爲而不然也宋因近世之法而無能改至今天子始詔天下有州者皆得立學奠孔子其中如古之爲而縣之學士滿二百人者亦得爲之而繁昌小邑也其士少不能中律舊雖有孔子廟而庫下不完又其門人之像惟顏子一人而已今夏君希道太初至則修而作之且爲子夏子路十人像而治其兩廡爲生師之居以待縣之學者以書屬其故人臨川王安石使記其成之始夫離上之法而苟欲爲古之所爲者無法流於今俗而思古者不聞教之所以本又義之所去也太初是無變今之法而不失古之實其不可以無傳也

繁昌紀勝

潘之恒

繁昌舊縣瀕江有三山二磴大信陽山返秦之勝皆勝於水今縣移萬山中有上峩嶺馬人隱靜浮丘之勝皆勝于山而荻魯二港滙池徽寧三郡之水清沚澄淵媚姿敷穀在宛句長姑之上以澤廣而隄平與江流相映發為山水最勝處則是邑也江南之仙都神君之奧區也豈宜以僻居褊小而謙讓于大國之間茲徵邑志多未備因標其勝而兩紀其遷建所繇以為山水之綰轂在焉作紀勝記

隱靜山普惠寺

入圖畫

李白

我聞隱靜寺。山水多奇蹤。巖種朗公菊。門深杯渡松。道人制猛虎。振錫還孤峰。他日南陵下。相期谷口逢。

隱靜寺

張祐

松徑上登攀。竹深烟靄間。合流厨下水。對聳殿前山。澗壑鳥聲迥。泉源僧步閒。更憐飛一錫。天外與雲還。入隱靜寺途中作

釋清塞

亂雲迷遠寺入路認青松。鳥道緣巢影僧鞵印雪蹤。  
艸烟連野燒谿霧隔霜鐘。更遇樵人問猶言過幾峰。

隱靜山

梅堯臣

心存名山久積歲未及遊將過值風雨路不通馬牛  
丁壯四五人藍輿時更休轉谷逢煙火下濕多田疇  
偃穢黃雲壓刈麻東盈丘始覺山門深長松如騰虬  
直上百餘尺蒼然葉修修五峰迎人來冷逼臺殿秋  
石泉出雲中引入舍下流緣源至巖口巖底魚可釣  
天昏碧雲去菓熟清猿偷艸木不盡識自起詩人羞  
濺濺澗水淺苒苒菖蒲稠菖蒲花已晚菖蒲葉尚柔  
靈根採九節試共山僧求逡巡龍致至衰病每堪憂  
昔聞有釋子渡江乘杯浮棲心向茲地理骨在林陬  
峻陰漏邪光徒歎衆巔幽夜還南陵郭幾落猛虎喉

隱靜寺

楊傑

五嶺碧崔嵬雲深隔世埃寺從梁氏建僧自梵天來  
錫井三泉迸松門十里開如今渡江者見說不浮杯



隱靜山

張伯玉

高士浮杯來投錫頓清絕到今千丈松閑伴五峰雪  
凌烟孤鶴起向晚啼猿歇不見纖塵飛寒泉湛明月

隱靜山

周紫芝

短策羸驂山路長松陰十里午風涼飛來一水自碧  
落屹立五峰叢上方清鳥也隨人聽法老僧聊爲客  
爇香泉聲洗枕渾如雨月色滿巖疑是霜

隱靜山

范成大

五峰抱巖屏千柱奠雲壑荒原蕞爾縣有此寶樓閣  
維昔經營初衣錫化雙鶴杖頭具隻眼矯矯雲中落  
尊者一笑許璇題照林薄庭栢有祖意石泉韻天樂  
清簣嘒碧雞飛梭擲蒼鵲號風飢虎怒失衣啼猿愕  
英遊偶然同吏檄乃不惡題名記吾曾醉墨芥丹堊

雲光院記

蔣 儼

縣城西郭七十里有東漢春穀縣之遺趾後因以名  
鄉鄉之北鄙抵于大山巖峰秀異於他山山之林巒

溫潤於他木識者以爲下有泉洞故爾洞門如圭勢  
實天鑿四面來束納崖相撐腹內周圍似碾而成仰  
視嵌空怪狀非一若羽若鱗若動若隨不知所以然  
者蓋疑山川陰陽有吐納蓄洩之道不若開爲流泉  
決洞門之壅滯復穿石竇達于洞外注爲澄潭下灌  
良田功价造化若乃松韻秋景鳥鳴春林野花爭芳  
吐川噴雪不可得而名也洞之西偏有石壁屹立高  
三十餘仞廣袤等夷顧有丹青玄黃錯襍垂蘿引蔓  
布列纓綉石壁之下復有名園流泉遶其兩面巖翠  
環其四隅先是故遠郃常選樂安蔣公諱誦甫得之  
未遑經始而傳於故明州同功叅軍蔣公諱理同功  
之季年顧命其子係曰是地也鄰接靈境不得藝桑  
麻可請名僧崇建蘭若依托寺宇而根固焉是以君  
子躋之係旣免喪於太和七年有禪僧超覺自金陵  
杖錫而至曰我尋山水者度量弘博珠融月圓係乃  
以前意見託忻然而受覺公乃經丈尺具畚撝芟治

繁蕪石夷壤達置方丈而景像旋生矣於戲天作靈  
奇而覺公潤色之以合天地之心開成二年請附屬  
於隱靜寺時上座僧文度寺主僧道琮都維郡僧文  
昱皆道門樞轄釋氏師長迺曰此地斯來符昔徵矣  
貞元中故工部尚書博陵崔公字斯邑也曾遊茲洞  
崔公佳之有紀行之什自洞廻驂親翰於寺之壁事  
既契叶不其休哉遂兼以公之作聞於官司因隸於  
隱靜寺焉覺公欲刊石爲紀使後人知其所由來乃  
有處士南陽左歡寔丘明之遐裔亦當今之俊選好  
述錢媛始契宐家惜桃夭之芳晨痛梧桐之先落鳳  
琴罷響魚日常開捨其服翫粧奩獨致豐碑之用羊  
公遺愛墮淚於峴山今左氏思賢淒涼於石壁儼固  
不才詎識文章之絕律以宗室之休美輒受命而爲  
記

馬人山記

潘之恒

馬人山擅名于江南曩憇南陵思一造之未果今年

春荻港募橋僧以疏謁余姑孰卽馬人山蓮社僧也  
秋至荻港再逢之盍導我故山而爲公津梁欣然爲  
前驅初擬鈴口入可廿里至爲甚快崔銓部公靳余  
何子之亟馬人而必求諸寺寺之外爲馬人者尚廣  
出記讀之寔由獅子峰以陟雖攬勝而未搜奇余將  
補其所略而續記之復三日爲弛期過繁昌問徑於  
李大行聞生生請從亦以瘡止余決策往且挾阮周  
生釋靜菴西行十五里至中分披林障見一山涌地  
出巋然如簇玉林周生大叫奇絕余心知爲馬人又  
進一邨曰八分而馬人乍隱見逾澗橋而全體始露  
如觀大將之營棨戟森列纍纍諸峰爲壘爲堞爲擁  
麾爲建纛爲展旗巨者爲龍首爲駝峰爲象齒爲虎  
豹之班而細者爲雙猫爲碩鼠爲燕雀爲蚊蚋之睫  
倫於秋豪皆聚於槃而撮于掌可僂指盡也以余所  
見洞庭之石公峭立於波際黃山之石筍刁出於海  
子吳門之天平攢布於笏林未有若此山之峭而奔

如刃而眩如攢而秩如散而能聚翕而能張若觀劇  
而巧技襍陳若觀豔而遺世獨立觀荷而菡萏凌波  
也闇生曰子之狀馬人也無匿景矣如唐突三山何  
余笑曰三山固足孕馬人而馬人稱三山之肖子父  
母雖華麗不與幼稚爭妍媿余不及窮宛委以窺其  
奧姑貌言之爾遂選石而鐫其崖以詔後游者

馬人山蓮社院二首

鮑信叔

朝南暮北遍田疇藍舍茅茨得暫休今日不知何處

宿月明霜冷逼衾稠

半天石壁倚晴空中有招提拱翠峰試問書堂何處  
是硯池清渚白雲封

鳳凰山

入圖畫

楊萬里

蓼岸藤灣隔盡人大江小汊繞成輪圍蔬放荻不爭  
地種柳墜堤非買春匏瓠故教俱上屋漁樵相倚盡  
成隣夜來更下西風雪蕎麥梢頭萬玉鱗

遊甌山

庾肩吾

平子去已久餘風今復追未必遊春草王孫自不歸  
路高村反出林長鳥更稀寒雲間石起秋葉下山飛  
西河方閱訓詎得解朝衣

宿甌山

韓翃

山中今夜何人門下當年近臣青瑣應須早去白雲  
何用相親

別甌山

前人

一身趨侍丹墀西路翩翩去時惆悵青山綠水何年  
便是來期

飯覆釜山僧

王維

晚知清淨理日與人羣疎將候遠山僧先期掃弊廬  
果從雲峰裏顧我蓬蒿居藉草飯松屑焚香看道書  
爇燈晝欲盡鳴磬夜方初一悟寂爲樂此生閒有餘  
思歸何必深身世猶空虛

夕遊覆釜山道士觀登玄元廟 錢起

冥搜過物表洞府次溪傍已入瀛洲遠誰言仙路長

孤煙出深竹道侶正焚香鳴磬愛山靜步虛空夜涼  
仍同象帝廟更上紫霞崗霽月懸琪樹明星映碧堂  
傾思丹竈術願采玉芝芳儻把浮丘袂乘雲別舊鄉  
登覆釜山遇道人  
前 人  
真氣重嶂裏知君嘉遁幽山階壓丹穴藥井通泆流  
道人帶經出洞中攜我遊欲驂白塊去且爲紫芝畱  
忽憶武陵事別家疑數秋

仲春晚尋覆釜山

前 人

胡蝶弄和風飛花不知晚王孫尋芳草步步忘路遠  
况我愛青山涉趣皆遊踐縈迴必中路陰晦陽復顯  
古岸生新泉霞峰映雪巘交枝花色異奇石雲根淺  
碧洞志忘歸紫芝行可搴方嗤嵇叔夜林卧方沉湎

覆釜吟

唐汝迪

我來覆釜下嵐氣橫山腰野花覆智井寒颺風蕭蕭

靈山寺

杜牧之

西巖一逕不通樵八十持盃未覺遙龍在石潭聞夜

雨雁移沙渚見秋潮經函露濕文多暗香印風吹字  
半消應笑南來又東去越山無路水迢迢

靈山

楊傑

繁川靈鷲山山頂駕老屋初從曲徑登疊石盤巖腹  
景逐軒檻轉雲烟眩游目憶昔心上人欲往怯洄洑  
前人漲白沙環流變平陸昨夜暑雨暴高低或成谷  
感物鑿江水江水清可掬莫驚秋霜飛能換鬢邊綠  
我有紫陽丹晶明大如粟服之能長生千載一時設

靈山

楊次公

方丈門須四面開爲師繩墨棟梁材不惟剩得江山  
景兼有清風面面來

靈山

周忱

江濱聞有古招提望入黃蘆徑欲迷就水稻畦分遠  
近架巖僧舍逐高低虎諳地僻尋常至鳥悅林深自  
在啼不爲扁舟風信阻此山那得一攀躋

鵲磯庵

鄧一儒



砥柱峰巒削不成山椒坐見白雲生羽毛欲就層霄  
近鐘磬遙傳萬壑鳴南北望餘俱艸色古今閱盡是  
濤聲攢眉豈爲無尊酒謗劣空慚吏隱名

板子磯

入圖書

張舜民

石上紅花低照水山頭翠篠細含烟天生一本徐熙  
畫祇欠鷓鴣相對眠

板子磯

周忱

獨樹江中影叢篁石上根岸迴山勢斷江狹浪聲喧  
廟廢無香火船來積纜痕忘懷釣魚叟款乃自朝昏

過三山磯

王思任

櫓港懸帆正發寅銅陵忽快已餐晨雲呼萬壑驚龍  
伯浪浴千峰失馬人腥雨吹豚俱隊隊盲風折鷺反  
踈踈何如一曲湖中鏡穩坐家船看錦春

過繁昌夾口忽得颶風爲詩紀之

朱荃宰

片帆輕百里鼓浪下繁昌故國荒烟靜驚風發棹狂

蘆花迎斷岸浴鷺冷新霜縹緲臺空在江流盡日長

夕逗繁浦

入圖書

劉舟

日入江風靜安波北未流岼廻知舳轉解纜覺船浮  
暮烟生遠渚夕鳥赴前洲隔山聞戍鼓傍浦喧棹謳  
疑是辰陽宿於此逗孤舟

下峩橋

楊誠齋

一溪秋水一橫橋近路人家却作遙柳遶溪橋荷繞  
屋何須更着酒旗招

下峩橋

陳天予

萬株楊柳綠成行十頃江波肆渺茫雨過葑蕀成小  
景一雙飛鷺下斜陽

繁昌道中

吳龍翰

江清日暖竹爲輿獵獵春風載此臞奏入灞橋成一  
畫楊花吹雪糝吟鬚

過繁昌

陳造

江山互映帶竹樹渺隱見居人江山間安處忘古縣

泊舟穴子初舊觀儼自薦  
磻山高攬雲雲際抹深靛  
尉我塵埃容嘉此煙雨面  
山脚慣奔走尉曹分卑賤  
縣人應指似鬢改顏狀變  
漂零渠未知憂患嘗欲遍  
俛仰二十年轉眄閱蜚電  
故人半在亡在者或海甸  
明朝理去楫山影暝江練  
安得人如山來往長相見

繁昌早發

前人

客行固塵身畱滯如振翼  
及茲祖禮竟蓐食理帆席  
風停浪未蟄天曙月正白  
版磯匯湍殺荻港煙樹碧  
杖策丁家洲徙倚容少息  
無酒問山店憶鱸聽村笛  
鳥鳥啼松行雁鵠下沙磧  
回柁投曲澳又寄糝潭夕  
情疎或易合不作淮楚隔  
纍然槁項翁欲語慰行役

荻港早行

許有壬

水國空秋晚羈愁感歲華  
清霜醉楓葉淡月隱蘆花  
漲落高低路川平遠近沙  
炊烟青不斷山崦有人家

晚泊荻港

童軒

漁艇已收綸斜陽下烟水  
寂寂掩篷窓坐聽舟人語

次荻港

吳汝弼

晴蕪眺罷事霜毫  
點染秋雲散海濤  
餘興歸來眠未  
得  
蘆花寒月滿江皋

書荻港驛

楊廉

客懷祇合醉騰騰  
荻港來沽酒十升  
貧戶爲垣編白  
葦  
小墟陳貨掛青藤  
乾坤好似閱人傳  
身世渾如行  
脚僧喜是郵夫供  
筆墨聊將履歷記  
吾曾

荻港值雨

王佑

白浪如山雪作堆  
淮雲將雨渡江來  
畫船撐入蘆花  
港掩却蓬窗半面開

汎浦港

楊萬里

水鄉浮國最輸農  
無旱無乾只有豐  
碧荳蚤爭桑蔭  
底綠荷雜出稻花中  
是田是沼渾難辨  
何地何花不  
一同若遣明年無  
種子却愁閒殺雨  
和風

太平三書卷之七

濟南張萬選舉之甫編輯

繁昌勝槩二集

宿隱靜寺

釋清塞

一宿五峰杯渡寺虛廊中夜磬聲分疎林未落上方  
月深澗忽生平地雲幽鳥背泉栖靜境遠人當燭想  
遺文暫來此地歇前足望斷故山滄海濱

隱靜山

賀鑄

不有非常事安能警世頑浮杯臨巨浸飛錫卜靈山  
六代興亾際三生去就間空餘宰堵在隻履又西還  
隱靜山  
梁敏  
路循山趾撥烟霞來到山中釋氏家經案爐香熏貝  
葉竹籬晴日曬袈裟幽花滿澗流春漲古栢連陰積  
翠華行役頗疲心正渴不慚需喚幾盃茶

毘盧閣記

韓元吉

竝江而南自建業歷姑孰其山之著者隱靜介於句  
曲九華之間初無奇形異態以峻拔表見於外而澗  
壑逶迤草豐木茂五峰錯立如高人勝士超然迥出  
於埃壘非世俗所得而有也山之寺曰普惠棟宇宏  
麗佛事煥列足以稱其山寺之長老曰妙義大師道  
恭乾道三年住山二十有四臘矣禪學雖通而持律  
嚴甚足以稱其寺恭之始來也旣圯於盜因徹而新  
之築大殿植二樓峙傑閣於南闢丈室於背周廊重  
廡環舍數百無一棖一桷仍其舊者恭嘗自歎以爲

九平三書 卷之七  
積此歲月其志願之力粗已伸矣而寺故有閣藏三  
朝御書百有二十軸規制卑陋不足安宸章寶墨之  
重客過而問之恭則懼然曰吾敢後此哉是以嚴天  
子之書非朝命郡邑之請懼不可爲耳可自爲邪今  
爲矣於是鳩工庀材夜以繼日歲十二月乙未閣亦  
新焉先是閣之建實嘉祐三年郡人郭祥正爲之記  
謂其甲於寺屋也乃以卑陋易之則其興造加於舊  
率可知矣明年三月告成恭來言曰以楹數之從橫  
爲七十四楹以赤度之高下爲七十赤中以度御書  
後爲複閣以安毘盧遮那之像左右飛閣道壁涌千  
佛欄楯四合可以周旋瞻望作禮圍遶在我教中毘  
盧遮那廣大樓閣第一切處使昧者於此不勞彈指  
同入如來大光明藏而雲漢昭回炳耀大千實我導  
師矣願併記之蓋宋興至太宗皇帝悉平僭亂章聖  
登封降禪以告成功仁祖偃武修文躋於極治萬幾  
餘閒始得游意翰墨三聖奎豐在世爲多高出唐正

觀右頒之天下以鎮夫名山川惟隱靜以梁意嚴師  
杯渡道場獲受此賜建炎初賊張琪巢焉書以僅存  
是有神佛陰拱而護之今道恭典治是山能竭已力  
美輪奐以侈上施又崇像設益闡其師傳用錢凡四  
百萬積工凡萬一千有奇而佛像之費不在焉志勤  
而意廣誠可嘉者嘗讀華嚴考所謂善財童子求善  
知識自妙峰極海岼國展轉南行蓋百一十許最後  
始登毘盧大閣方能了知一切莊嚴自在境界然是  
童子初入胎時七寶樓閣已現其家及見世尊逝多  
林中重閣故在而山巔水涯城郭市肆人天仙鬼諸  
聚集相奔走殆徧是遭文殊調劇不悟自今回觀可  
發大笑恭之不起於坐旣已莊嚴佛土矣而最後因  
緣猶示此閣善財不生彌勒未見將與文殊義爲同  
異必有能辨之者時以一御書在焉則甚大而光明  
矣夫恭笑曰然所以求子記者此也遂爲記

靈山戒香院

王安石



靈山名誰自波濤截孤峰何年佛子住四面虞危空  
折椽與裂瓦委葉填西東庫廊行抑首居者莽誰容  
吾舟維其側落日生秋風瞰崖聊寄目萬物極纖穠  
震蕩江海思洗滌堙鬱中胡爲嬉遊人過此無畱蹤  
景起無遊殊盛衰浩無窮吾聞世所好樓殿浮青紅  
那知山水樂豈在豪華宮世好萬事耳感激難論工

金地院

楊傑

大曆年中茅結宇禪翁甌錫久曾留泉飛堂下雨長  
滴石偃道旁雲不收野鳥歸來羣木晚老猿啼罷一  
山秋世人多事頭多白底事情閒亦白頭

夜宿陽山磯將曉大雨北風甚勁俄頃行三百

里遂抵雁翅浦

陸游

五更顛風吹急雨倒海翻江洗殘暑白浪如山潑入  
船家人驚怖篙師舞此行十日苦滯留我亦蘆叢厭  
鳴觴書生快意輕性命十丈蒲帆百夫舉星馳電驚  
三百里坡壠聯翩雜平楚船頭風浪聲愈厲助以長

大平三書 卷之七 五  
笛撾鼉鼓豈惟澎湃震山嶽直恐瀕洞連后土起看  
草木盡南飛水鳥號呼集洲渚稽首龍公謝風伯區  
區未禱煩神許應知老去負壯心戲遣窮途出豪語  
繁陽阻風 王守仁  
阻風夜泊柳邊亭嬾夢還鄉午未醒卧穩從教波浪  
惡地深長是水雲冥入林沽酒邨童引隔水行歌漁  
父聽頗覺看山緣獨在蓬窓剛對一峰青

出三山夾安流數十里泚大江 朱荃宰

舟過三山夾潮平榜半柔緣山陶穴復落日氣夷猶  
手檢蕭丞籍神遊謝眺樓兼天浪忽湧知出大江頭

荻港雨行 管訥

昨朝辭岸喜秋晴今日吳船雨裏行人事天時何可  
測青山碧水總關情久知盟與沙鷗冷那得身如野  
雀輕怪底石尤風太惡窓前百丈進修程

荻港驛 劉用景

枯荻邊長港名亭信有徵居人無別業比屋掛魚罾

地曠嵐光淨潮來水勢增經過重歎息殘臆客金陵

太平勝槩補遺卷之八

濟南張萬選舉之甫編輯

自金陵泝流過白璧山翫月達天門寄句容王

主簿

李白

滄江泝流歸白璧見秋月秋月照白璧皓如山陰雪  
幽人停宵征賈客忘早發進帆天門山迴首牛渚沒  
川長信風來日出宿霧歇故人在咫尺新賞成胡越  
寄君青蘭花惠好庶不絕

寄當塗趙少府炎

前人

晚登高樓望木落雙江清  
寒山饒積翠秀色連州城  
目送楚雲盡心悲胡雁聲  
相思不可見迴首故人情

罷姑孰寄元明用觴字韻

黃庭堅

追隨富貴榮牽尾準擬田園略  
濫觴本與江鷗成保社聊隨  
海燕度炎涼未栽姑孰桃李  
徑却入江西鴻雁行別後常  
同千里月書來莫寄九回觴

當塗解印後一日郡中置酒呈郭功甫

木蘭花令

前人

凌歊臺上青青麥姑孰堂前  
餘翰墨暫分一日管江山稍  
爲諸公分皂白江山依舊雲  
空碧昨日主人今日客

再贈郭功甫長句

前人

少年得意從軍樂晚歲天教  
閒處著功名富貴久寒灰翰  
墨文章新諱却是非不用分  
今昨雲月孤高公也莫喜歡  
爲地醉爲鄉飲客不來但自酌

花將軍歌

李東陽

花將軍身長八尺勇絕倫從龍渡江江水渾提劍躍  
馬走平陸敵兵不敢逼主將不敢嗔殺人如麻滿川  
谷徧體無一刀鎗痕太平城中三千人楚澤十萬勢  
欲吞將軍怒呼縛盡絕罵賊如狗莫敢信檣頭萬箭  
集如蝟將軍願死不願生作他人臣郤夫人赴水死  
有妻不辱將軍門將軍侍婢身姓孫收屍葬母抱兒  
走爲賊俘虜隨風塵寄兒漁家屬老姥死生已分歸  
蒼旻賊平身歸竊兒去夜宿陶穴如生墳亂兵爭舟  
不得渡墮水不死如有神浮槎爲舟蓮爲實空中父  
老能知津孫來抱兒達行在哭聲上徹天能聞帝呼  
花雲兒丰骨如花雲手摩膝置泣復嘆雲汝不死猶  
兒存兒年十五官萬戶九原再拜君王恩忠臣節婦  
古稀有嬰杵尚是男兒身英雄在世竟不朽下可爲  
河嶽上可爲日星君不見金華文章石室史嗟我一  
賦豈有筆力回千鈞

青山遊記

阮大鍼

姑孰郡采石太白樓負山俯江景地絕勝予嘗與同年曹元甫酌月而卧其上凡三極磴礪之致但未得一展先生墓於青山誰爲微纏成我紕漏可笑也茲來誓必了此十月乙巳雨止風日霽善乃從元甫出南門越浮橋東行輿人踐途中黃葉颯颯有聲望村炊所滙如虹而碧此與廬嶽香爐紫烟應不復有差別再問渡則去山差近便如歸鳥軒軒情閒而勢果

無復粘礙途所值多荷蓀驅犢人狀皆淳朴私念昔賢流寓往往取斯土爲傳燈於吟眺外將無以若輩爲層峰複壑人情可隱與十里過高崗鋪再進遂摺而行塍間野日滿田荒荒搏影澣人塵胃何必聽春夏之際灑灑水聲邪林薄聞聞山雞細啼啁籬楚楚是爲友人倪子叔遠叢桂館館乃叔讀書處先二日與約山遊當假憇於此至則主人已開徑相遲蔭軒古桂株葉淨好頗類其家清閼所剪拂高梧矣小立

瀨齒相與曳杖步里許至先生墓道道前觀元人篆  
碑亭亭如笏才人蛻隧着蚪蚪數字於石間開草叅  
生面大非平等丘墓翁仲碌碌可比謁墓墓在青山  
之趾祠卽趾於墓下與同遊者持瓣香酌酒一斗望  
高霞而拜之塚土如箕遺像無恙疎松細竹錯列華  
表此時錦袍江月生氣浮動空翠中若取雪泥舟壑  
獻吊青蓮未免令木客山鬼婆娑笑耳元市導予看  
東壁上箴唐人宣歙使范傳正所撰墓碑讀之事既

蒐臚文亦酣峭乃獨關汾陽爲脫獄事似有所諱元  
甫曰予向有文耑詳雪此誣謂高華蓋世如先生汾  
國功其功也乃哲於郭令而愾于永邱豈其然予聞  
此掀髯爲快非吾元甫亦惡能持此雪浪排空高掌  
抉霓之語撥轉千古眼孔使無盲蝕因念代易世殊  
露泡一過彼開元之際如艷妃力士所踞崇高富貴  
暨朝暮雨雲呼吸霜澍之風流氣燄豈不濃赫一時  
哮喘千載予向使出華清馬嵬之區野草極天問其

人所化黃土泥乎塏邪村翁牧豎啞然相顧未有以  
應先生一放逐小官收身鼎俎霞扶老骨酒湛文心  
而岱宗一去東海揚鞭又不知幾變到來谿山如笑  
封樹沃若竹雞水鶴時翔集祠側而春山蘅杜反乞  
靈於逝者之魂骨爲香歲時伏臘文人墨士紛紛持  
瓦盆麥飯競相尊奉秬鬯滴酒亦無事成紀兒孫代  
嗣香火矣夫文章之氣關乎河嶽其行世也如霧登  
空如水灌下通塞盈虛隨量而受特借人軀體一搏

附之以自表著軀有成毀氣無住歇後之景前此之  
悅彼皆是物也實獲本心豈繇外慕此可爲分靈光  
岳者水乳鍼磁一相證合不則定謂老兵斯語嶽嶽  
太狂吾爲此懼也然則天于先生一身雖沈頓其皮  
骨於生前而獨尊養其神明於化後所以待之者厚  
於王公貴倖過眼銷枯遠甚而腐鼠相嚇之名擁腫  
不材之算會何足當彼尻輪神馬乘氣無方捫蝨一  
唾乎元甫叔遠及同遊者聆予言各狂叫翠微四山



太平三書卷之八  
送響連浮太白攜餘興以飲於山館桂下流連至暮  
相與放歌谿上御烟而還元甫欹側輿中醉貌可掬  
過渡口菴取桃花泉水吸數合漸覺神情開朗予謂  
此挺身爲供奉沈香亭醉草清平一作臨本元甫絕  
倒同遊諸子叔遠及門人損之烈卿館甥肅應皆莞  
爾云然不謂予言之妄是遊得詩凡十章道上成者  
二飲桃花泉水者一歸臥遙集堂成者三上郡邑請  
修祠牆者四竝爲記

同根遂同年叔遠損之烈卿肅應梁甫拜供奉

墓祠還叢桂山房小憇

前人

雨止天氣正庭竹飄涼烟仰矚無寸雲高興何蒼然  
曳杖出城市放歌響平田曉月輪未沒青山當我前  
茲山臥谿上雲霞高且鮮仙人偶寓託永謝區中緣  
松花釀春酒醉理中山眠夢中發浩笑塚樹何連綿  
至人足神理壽命非所先歸鶴無乃愚山鬼誠足賢  
大笑問終古夫子何亭亭盡醉山月白在謠海烟青

騎烝自來去麾手辭天刑世人昧遠覽誤謂收星精  
陰霞抑嵩華夜景搖滄溟松風空際來飄然聞流鈴  
玉女隔谿笑手抱山海經丹脣噴香雨翠翮冲雲屏  
窈窕不可求薜路蒼冥冥

高士懷遠情結搆青山趾花木稟和氣寒月養芳綺  
鷄鳴紅藥外猿嘯蒼谿裏吟從桂峂開琴向松門起  
旣畊亦以讀愛此土風美誓當剪茆茨相從釣谿水  
飯牛春草香放鶴秋烟紫朝昏禮翠微無爲市朝滓

同根遂過城南菴菴僧若影汲桃花泉煮茗

前人

日暮谿水綠平楚亦蒼然遙聞槌磬聲旋憇香林前  
一龕納空翠拂拂青山烟雪乳傳素瓷茗味冽且鮮  
上人向予笑謂是桃花泉狀流貫石骨噴深凌通川  
連飲破五濁孤爽如秋蟬憶昔游躑突漱齒逢冰天  
歸臥高巖雲去此垂廿年茲復酌澄潔彌覺身心便  
禪悅何其腴襟慮亦以蠲誓當犯毘尼露竊香中蓮

遊青山還將下金陵東謝鄭郡伯楚石吳令君

青嶽并乞葺供奉祠垣

前人

谿上烟含樹樹棠江鷗野客共迴翔官厨不匱胡奴  
米幸舍長傳列子漿壑定魚龍閒勝月天高鴻鴈細  
排霜茲遊最是抒懷事特祝青山一瓣香

霞細松寒山鳥鳴高祠風景似平生邨空夜送敲砧  
響地煖晴看負耒畊雀粟覆車呼不擾魚鹽入市值  
都平仙人鯨背應酣笑爲政無如此地清

山桂青青笑不言天風無朕海雲寬世人置眼多雞  
鶩之子遺身已鳳鸞夜夜日華生白苧年年春雨浴  
紅蘭紛吾脫略能相許只作蘇門嘯答看

移文會不費招呼高屐輕藤手自扶山半炊烟能映  
帶隴西香火未荒蕪孤亭碧葉喧松鼠十月青霜貫  
木奴尚有向南垣土缺編筠樹槿待枝梧

過采石望李供奉祠

前人

山川何寂寞文藻亦荒涼藉有高人蹟能延衆木香

江聲寒古瓦空翠飲文梁笑酌兵厨酒惟君預我狂  
宮錦袍閒月還來照舊祠青山秋欲盡白也醉何知  
竹點湘妃淚松吟山鬼辭江雲來復往夢路寄相思

九日曹梁甫招遊姑谿

前人

欲暮谿烟動秋峰未可攀孤舟隨意泊野興亦能閒  
盡醉菰蒲曲聞香橘柚間浩歌出漁浦明月照青山  
遙念江村俗秋田競飯牛一身遽漂泊九日轉離憂  
旣賭萸房酒還操蓮葉舟因君敦雅尚搖落頓無愁

采石登翠蘿山三台閣望曹光祿元甫舊閣攜

謝東元甫次公曹梁甫

杜祝進

攜謝曾招太白無眼中雙閣一山孤摩空易幻諸天  
色視下誰敝疋練圖江海淥迴洲夾浦東南愁入楚  
兼吳何時種就芙蓉樹來往仙人註六符

太白墓

胡永順

青山孤塚謫仙存草覆殘碑字可捫千古艷傳天子  
眷一坏空掩夜郎魂何年曾此浮宮錦今月依然照

酒尊我欲起君論往事繽紛黃葉滿前村

蕪湖舟中同范長白念公看月 袁宏道

夜泉香鍛石鑪紅聽盡寒松帶雪風算取人間幾月  
子江心甌面復瓶中

采石蛾眉亭

前人

空江石壁瘦鱗鱗膩綠頹斑酣冶春掃取山光爲黛  
粉儘教蕩子作仙人

秋日同唐祖命退閒登白紵

郭昭封

蕭森金氣滿人間丘壑秋情本自閒贏得桃源且一  
日飛來朝爽已千山探奇徙倚猶嫌淺拜石低徊却  
敬頽倒着接離須盡醉君平身世不相關

冬日舟發采石江

徐咸受

寒江波靜意偏閒望入空天遠岼間濃淡成行烟裡  
樹淺深着色雨餘山帆如過雁相隨落客與浮鷗自  
往還此夜不知何處泊好謀斗酒一開顏

初秋姑溪晚泛

劉覽玄

牽人遊興晚如何  
傍柳穿荷任棹過  
醉後路忘溪曲  
遠閒中情向鷺鷥多  
水光初定風無擾  
山氣微開月  
與和只羨漁舸時  
上下此身嘗是習烟波

采石磯弔李白作

惲向

飛巖雲巖峨激浪彩明滅  
僊人駕青鸞獨影寒江雪  
當時衆鳥叫似欲濺腥血  
孤光一萬丈今古豈衰絕  
文章旣奪命魑魅安敢褻  
落月暗蛟龍濤聲靜撇捩  
奇懷聽幽響曠代許怡悅

青山詩和謝玄暉

前人

吾聞青山深荒幽鎖寒曲  
逶迤連峭蒨鋪碧染山足  
結茅撫秋清開軒入寒旭  
沼通蓮十丈硯洗平疇菜  
風流接玄賞千載替金粟

和謝東田詩

前人

絕跡苦促迫畊田卽行樂  
隨雲上荒陂因水結茵閣  
採菱魚田田放眼鳥漠漠  
風搖涼月動野曠寒星落  
春酒夫如何青山坐東閣

半渚磯和李白

前人

絕壑掛江心峰掌廻環向流澌亂雲石駭鳥求波浪  
精靈出復沒霞彩或千狀魚龍聽夜禪一覺蘆花上

太平山水詩畫爲司理張舉之先生纂集成卷

喜題十句

地以山川重人從詩畫傳烟霞無變滅丘壑仗周旋  
色相原無盡聲情豈一編總留無字影撮舉不周天  
笑殺旃裘氣空勞楮墨烟

入南寺和杜牧遊石盞僧舍韻 前人

火意沾南雲草樹森古脉怡融舊刹下停址罷頽拆  
風微殿角靜蟬翅響無力雨新塵漫飛遠頰村羃羃  
幸而毒熱散陽和委阡陌入見牟尼光燦爛煩苦釋  
廊廟誰家子擬作江湖客心安意廓然遠近非所畫  
前途已漫汗聊此祇園適

曉入林塘赴曹梁父招 葉 燧

披衣曾不待雞鳴夢裏先聞招隱聲明月達晨山嶠

曉涼颼舉袂客輿輕經過別墅皆知姓疑似遙峰亦  
辨名獨有纓歌窮孺子漢章凝望覺愁生

謫仙祠懷古限韻

黃濤

翠螺峰青青一梗燃犀亭蟄蛟龍影上有英雄戰血  
痕王氣猶然赤炳炳乘風共弔騎鯨客避暑野航忘  
夜永開元天子荔枝香謫仙驕卧江山冷錦衣捉月  
亦嘗事一往高名並箕穎詩魂推倒白玉樓酒座直  
踞狂士頂奇哉牛炙浣花翁江漲耒陽真刎頸千古

庸人多考終兩翁如此理不省采石磯荒廟貌尊秣  
陵暮拜臙脂井乃知人傑地靈語振衣歸去心思整

謫仙祠懷古次前韻

紀映鍾

古人去矣波逐梗江山留得蕭蕭影翠螺忽占晚烟  
并突見寥天月孤炳扁舟如鶴橫江來濯足高歌夜  
光永謫仙詩句昔驚天骨壓蛾眉古雪冷酒酣涕唾  
堯舜廷晞髮歸來小箕穎謝家山色謝朓詩此地何  
殊太華頂醉鄉日月潦草過宮錦離披不掩頸山藏



仙蛻山亦靈落月寒鍾動深省長江卽是壺公壺下  
士看爲賀監井蒼蠅大笑滿世間干鈞弩折孤雲整

太白樓歌

杜濬

大江東流爲牛渚羣巒怒生若風雨采石青山互主  
賓天門劃作雙眉嫵江山奇絕異人來前有太真後  
宣武搔首問天携小謝乘舟咏月聞袁虎開元太白  
更清狂酷愛采石恣徜徉醉中放誕無不有捉月豈  
必全荒唐東山安石有別墅成都子美留草堂先生  
脫略獨不爾幕天席地無何鄉千年之後高樓起倒  
卷餘霞蘸江水山翠朝明酒客顏松風莫聒詩人耳  
青山一峰兩岸對先生自向唵魂醉一曲滄浪入畫  
圖平生蜀道歸螺黛三二年來禾黍愁拳碎寧惟黃  
鶴樓采石磯邊亦荆杞漁樵落落悲殘秋侏儒顛顛  
不足數太白淒涼古安有流傳無恙百篇詩興廢堪  
傷一杯酒茲來停策試看山畫棟朱欄碧靄間居人  
競說賢司理捐俸庀材方觀此西偏更闢松根堂謫

仙研席爰栖止欣然喚艇一登臨清風四面開余襟  
提壺携枕醉且卧翻疑往昔不如今文章萬丈重光  
焰山情水態參差見率僮爲歌太白樓前賢後詰俱  
堪羨君不見少陵詩汝與山東李白好張公長句知  
名早

行過采石驟逢風雨倏焉開霽山水清佳

馮達道

騷雅寄清遊山影攝江影征夫悅前路未歷意已聘  
一晴暢無極良時快浚省驟雨天北來如客心太猛  
四圍凜奇黑身若墮胥井神鬼紛攫拏蛟龍恣豪逞  
淒切行路難笑語忽清冷車後餘滴霑車前夕陽耿  
晴晦尺寸間晝夜咄嗟頃山光濕未乾江烟亂方整  
正以向突兀彌覺今遙永造物助客歡厥意在道警  
問石石無言秋情君素領

游采石

唐念祖

蘆筍甘時鱖正肥空江烟盡一鶯飛鐘鼓月路全歸

艇僧枕梅根不掩扉水落魚龍吹浪急巖深狐鼠咲  
人稀長安白日浮雲蔽畱得山花點客衣

游青山

前人

攜杖尋幽境青山不世情高低松翠裡一半作濤聲  
亭圃千家在琴尊滿座傾而谿人語寂花散六朝鬢

蚤發姑溪

方拱乾

遲曉延曲岼汀色綠堪茹宿雨穩眠鷺落花肥饌魚  
兵戈誰樂土舟楫亦吾廬風日淹能永歆床賴素書

晚眺采石磯頭

前人

大江含元氣波吞落日平明月接空蒼光從波心生  
獨立暮色古谷寂松乃聲三月春仍寒露下魚龍驚  
旅緒淡無託孤舟寡征營荒祠聞估客猶傳當時名  
文章異江水終古無變更川流悟消息遐哉曠代情  
拜太白墓

前人

百拜乃敢視不豐尚有碑文人何定骨精氣無不之  
死亦卜佳鄰有女知其私沉江不受窮搖嶽不受奇

委蛻不受靈封樹不受悲置此尋先生呼之或在茲

泊梁山月

前人

雪後月如浴到江光欲爭一舟牽石影半夜落潮聲  
眼入天何極坐來僧更清蓬窗無丈地亦復踏歌行

采石道中

前人

星輶隨白露秋意動衣裳江近雲生潤車輕日落涼  
游情寬使職古木表祠香沙渚披明月蒼蒼起暮光  
姑孰雨泊東何叔度

徐臣慶

才蘭江上棹風雨事宵征洲渚不知處菰蘆自可盟  
思君秋夜夢作客故園情旅食何堪寄勞勞乞步兵

采石

方玄成

一石吞江江勢橫神功疑與帝心爭潦侵纜路舟如  
鳥樹繞雲根水作城亘古伊誰追太白當年容易躍  
開平蒼茫又復成今昔朱夏蕭蕭冷月明

過太白祠

方亨咸

代謝祗人事空江不受遷古今留白日香火閱荒烟

後死誰詩伯當身已命仙多君天寶季猶得紀餘年

春日集蛾眉亭

僧道復

望從高處盡路路與春通  
煙水遠無異雷峰幻正同  
人來飛鳥外詩在落花中  
此意深于酒亭應名醉翁

晚登三山還望京縣

謝眺

灞浹望長安河陽視京縣  
白日麗飛甍參差皆可見  
餘霞散成綺澄江淨如練  
喧鳥覆春洲雜英滿芳甸  
去矣方滯淫懷哉罷歡宴  
佳期悵何許淚下如流霰

有情知望鄉誰能真不變

蛾眉亭

沈括

雙峰秀出兩眉灣翠黛依然鑑影間  
終日含顰緣底事祇因長對望夫山

題蕭尺木爲舉之司理畫太平山水圖詩

趙俱

五采毛錐出化工補天十指破鴻濛  
烟雲落處千山關翰墨揮時萬馬雄  
埋名勝蹟開生面傳神阿堵正

九平三書  
卷之八  
九  
個中肯學崑家標姓字聊存筆意寫癡聾今爲寫作  
太平圖可當黼黻明光錦若問職方禹貢書好付黃  
梁諸葛枕未籌方略上金城留同督亢獻荆卿博浪  
一椎雖不中山靈河伯皆震驚五月披裘非樵隱扣  
角長歌牛亦哂任人呼馬亦呼牛牽飲上流謝不敏  
先生滿腹牢騷氣卧遊十日不知味先生畫圖先畫  
詩詩中有畫方爲貴見詩何必見古人詩畫同歸憂  
世心愁聽紙上江流水夜半寒聲帶雨吟

泊太白樓下作

周祚新

南國佳山水至茲如結隣蛾眉憐俊逸犀渚鬪清新  
雲破青無數風來白有神維舟竝漁網雙領畫兼真  
泊采石晚登太白樓

周體觀

風雨蕭蕭李白樓登臨獨倚大江流蒼梧縹緲迷南  
浦宮錦淋漓瘴北丘牛渚秋深連陣壘蛾眉月冷臥  
沙舟思君不見空江晚極目烟波汎客愁

又

前人

太平三書卷之八  
江邊誰起謫仙樓  
江水橫分檻外流  
一代詩篇遺絕  
筆五陵風雨隱  
葳丘旅魂暗注  
鮫人淚石瀨空  
招釣女舟獨立斜  
陽川欲暝蒼茫  
雲物不勝愁

又

前人

采石橫江江北流  
謫仙曾此醉江頭  
瀟瀟鶴羽千年  
夢渺渺鯨波萬里愁  
玉露秋風驚落木  
蒼烟漁笛起寒洲  
不堪去國懷鄉客  
更上浮雲蔽日樓

又

前人

雲白山青江自流  
晚晴鷗鷺繞沙頭  
逐溪漁舍深相  
向隔岸秋風遠對愁  
客路煙霜垂老鬢  
天涯涕淚滿滄洲  
騷人已去風流邈  
浪跡空餘百尺樓

返櫂復泊采石秋  
益深矣撫時感事  
再用前韻

周體觀

信宿重開江上樓  
思君真是謫仙流  
拂綸滄海垂千  
尺晞髮陽阿問  
一丘氣奪中官猶  
臥酒恨遺妃子漫  
登舟可憐揮手雲  
霽遠獨抱吳江越  
水愁

又

前人

蘿薜交衡秋滿樓秋聲如水迸江流  
衰螢火斷黃山寺落雁魂孤白紵丘  
擊楫自憐同泛梗望洋何處辨歸舟  
古人亦見今人否隔代蒼涼多少愁

又

前人

江勢東來復北流孤藤扶上最高頭  
風吹不斷仙人邈月落還生帝女愁  
老樹秋荒麋鹿苑寒雲暮鎖鼓鼙洲  
前村一點黃昏火知是誰家照晚樓

又

前人

湖口連江亂急沈扁舟還許臥灘頭  
山含霜露蕭森氣水落魚龍汎濫愁  
銀漢西廻牛女岸金陵北湧鳳皇洲  
誰知無定行藏客雙袖龍鍾獨下樓

和周兵憲伯衡太白樓韻

萬胤轟

彩筆方懸丹鳳樓還驅煙霧靖江流  
公孫博物窺三紀太傅懷君歷九丘  
旌拂松蘿搜鳥跡節經島嶼問漁舟  
繇來作賦登高客不盡探幽弔古愁



又

前人

江漢蒼茫一倚樓，低徊學士舊風流。  
何辭落筆傳芳草，會見登臺賦古丘。  
幾處菰蒲分遠日，數行雁鶩繞歸舟。  
卽今惆悵非無意，莫認悲秋浪說愁。

又

前人

岷山西峙水東流，載酒憑高最上頭。  
鸞車虎瑟千年跡，嘯雨啼烟萬頃愁。  
古堞淒淒山外寺，荒墟落落荻邊洲。  
夜深更擬題新句，呼吸真通十二樓。

又

前人

夾岼霜楓響碧流，當年誰與臥沙頭。  
山分南北縱橫見，秋入芙蓉汗漫愁。  
午夜星文開紫極，巖城烽火動滄洲。  
拂衣欲醉清江月，風露高寒庾亮樓。

大正三書  
卷之八

三



